

Headlines

1. केंद्री गृह मंत्री अमित शाह होर 26 जून गी जम्मू च बनाए गेदे एनसीबी दे जोनल दफ्तर दा उद्घाटन करडन। दिल्ली च ओहू नार्को कोआर्डिनेशन सेंटर दी 10मीं बैठक दी बी प्रधानता करडन।
2. उपराज्यपाल मनोज सिन्हा होरें स्कास्ट कश्मीर दी 36मीं युनिवर्सिटी काउंसल बैठक दी अध्यक्षता कीती। मुखमांत्री उमर अब्दुल्ला बी होए शामिल।
3. भारत नै पाकिस्तान आसेआ संयुक्त राष्ट्र मंच पर कश्मीर मुद्दा पुट्टने पर सख्त ऐतराज जताया, आखेआ कि एहू भारत दा अंदरूनी मामला ऐ।
4. कठुआ जिले च इक मिनीबस हादसे च 23 श्रद्धालु घायल, केंद्री मंत्री डा. जितेंद्र सिंह प्रशासन दे संपर्क च, हर चाल्ली दी सहायता दा जकीन दोआया।
5. जम्मू-कश्मीर च 29 जून धोड़ी मौसम आमतौरा पर खुश्क रौहग, 30 जून कोला 3 जुलाई दरान बरखा दे असार।

<><><><><><>

Shah-NCB

गृह मंत्री अमित शाह होर शुक्रवारें नमीं दिल्ली च नशीले पदार्थें पर रोक लाने सरबंधी एनकार्ड दी 10मीं सभनें थमां बड्डे सतह दी बैठक दी अध्यक्षता करडन। ओहू जम्मू ते गुवाहाटी च एनसीबी दे जोनल आफिस दा बी उद्घाटन करडन। एहदा सरिस्ता नशीले पदार्थें दी रोकथाम नशीले पदार्थें दी रोकथाम सरबंधी ब्यूरो आसेआ कीता जा'रदा ऐ। केंद्री मंत्रालय राज्य सरकारें ते प्रवर्तन निदेशालय सरबंधी एजेसिएं ते होर दुए सरबंधी धडें आसेआ एहदा सरिस्ता कीता जा'रदा ऐ। इस मौके पर केंद्री गृह मंत्री नशीले पदार्थें दी रोकथाम सरबंधी विजन डाक्यूमेंट जारी करडन। अमित शाह होर 6 ज्हार करोड़ रपे दे मूल्ल दे नशीले पदार्थें गी नश्ट करने आहले आनलाइन ड्रग डिस्पोजल फार्टनाइट कैपेन दी बी शुरूआत करडन।

<><><><><><>

LG-SKUAST

उपराज्यपाल मनोज सिन्हा होरें अज्ज लोकभवन श्रीनगर च शेर-ए-कश्मीर एग्रीकल्चर युनिवर्सिटी कश्मीर दी 36मीं युनिवर्सिटी काउंसल बैठक दी अध्यक्षता कीती। मुखमंत्री उमर अब्दुल्ला ते मुख सचिव अटल डुल्लू हुंदे अलावा केई सीनियर अफसर बी इस बैठका च मजूद हे। बैठक दा मकसद युनिवर्सिटी दी प्रशासनिक कारकरदगी ते पूरे-पराते विकास लेई महत्वपूर्ण नीतिगत विशें पर तफसीली बचार बटांदरा करना हा। एह्दे अलावा बैठका च जम्मू-कश्मीर राई-बाई दे क्षेत्र च अनुसंधान, ढांचागत बेहतरी ते नमिं काहडें गी बढावा देने पर मुख तौरा पर ध्यान दित्ता गेआ।



India-Pak UN

भारत नै संयुक्त राश्ट्र च पाकिस्तान आसेआ जम्मू-कश्मीर दा मामला पुट्टने पर सख्त ऐतराज जताया ऐ। पाकिस्तान पर संयुक्त राश्ट्र मंच दा राजनीतिककरण करने दा आरोप लांदे होई भारत नै आखेआ ऐ जे सह अध्यक्ष दे तौर पर निरपक्ख रौहने दे बजाय पाकिस्तान नै ओह्दे दा गलत इस्तेमाल कीता ऐ। संयुक्त राश्ट्र च भारत दे स्थाई प्रतिनिधि पी. हरीश होरें सह अध्यक्ष दे तौर पर पाकिस्तान दे आचरण दी निंदेआ कीती ऐ। पाकिस्तान दे स्थाई प्रतिनिधि आसिम इफितखार अहमद हुंदी टिप्पणिं दे परते च पी. हरीश होरें जम्मू-कश्मीर पर भारत दे लम्में चिरें थमां चलदे आवा'रदे रूख गी दोहराया। उनें आखेआ जे केंद्र शासित प्रदेश जम्मू-कश्मीर पूरी चाल्ली कन्नै भारत दा अंदरूनी मामला ऐ।



Adv. Announcement

आकाशवाणी जम्मू दे प्रादेशिक समाचार एकांश ने प्हाड़ी भाशा लेई कैजुअल न्यूजरीडर-कम-ट्रांसलेटर ते स्टेनोग्राफर दे पैनल च शामिल होने लेई जम्मू-कश्मीर दे रौहने आहले 21 शा 50 ब'रें धोड़ी दी उम्मी दे इच्छुक मेदवारें कोला आवेदन मंगे न।

कैजुअल न्यूजरीडर-कम-ट्रांसलेटर लेई घट्टोघट्ट योग्यता कुसै मान्यता हासल यूनिवर्सिटी थमां ग्रेजुएशन ते प्हाड़ी भाशा दी शैल जानकारी दा होना ऐ। न्यूजरीडर लेई (प्रसारण लेई मुआफक) खरी अवाज दा बी होना जरूरी ऐ।

स्टेनोग्राफर लेई, घट्टोघट्ट योग्यता कुसै मान्यता हासल एजुकेशन बोर्ड थमां 12मीं पास होना ते प्हाड़ी भाशा च खरी जानकारी दा होना ऐ। कन्नै गै, कम्प्यूटर पर प्हाड़ी भाशा च टाइपिंग दी स्पीड 25 कोला लेइयै 40 लफज़ फी मिंट होनी लोड़चदी ऐ।

आवेदन दी हार्ड कॉपी 'हेड ऑफ न्यूज, रीजनल न्यूज यूनिट, आकाशवाणी, पंजतीर्थी जम्मू पिनकोड-180 001' दे दफ्तरै च (दस्ती) जमा करोआनी होग। एह्दे कन्नै सब्बै जरूरी दस्तावेज ते आवेदन शुल्क बी होना चाहिदा (जेह्दा वापस नेई होग)। सामान्य श्रेणी दे मेदवारें लेई एह् शुल्क 355 रपे ते एससी/एस.टी/ओ.बी.सी मेदवारें लेई 265 रपे (18 फीसद जी.एस.टी सने) ऐ।

एह् शुल्क प्रसार भारती, आकाशवाणी, जम्मू दे बैंक खाता नंबर 10582387126 (एस.बी.आई मेन ब्रांच, हरि मार्केट, जम्मू) च ऑनलाइन जमा कीता जाई सकदा ऐ। आई.एफ.एस.सी कोड: SBIN0000657 ऐ। शुल्क जमा करने दे बाद मिले दे स्क्रीनशॉट दा प्रिंटआउट जां ऑनलाइन पेमेंट/ट्रांजैक्शन आईडी, आवेदन दे कन्नै जरूर होनी लोड़चदी। आवेदन करने दी खीरी तरीक 19 जुलाई 2026 (ऐतवार) ऐ। मती जानकारी टेलीफोन नंबर 0191-2546658 ते 9697177241 पर लैती जाई सकदी ऐ। तफ्सीली इश्तेहार ते आवेदन फॉर्म साठी वेबसाइट www.newsonair.gov.in पर होमपेज दे अखीरै च 'Vacancies' आइकन पर उपलब्ध ऐ।



Kathua-NCC

कठुआ जिले दे बिलावर इलाके दी डिंगी सिम्बली थाहर पेश आए दे इक शिड़क हादसे च 23 लोक घायल होए न। स्हाड़े जिला संवाददाता दी रिपोर्ट मूजब श्रद्धालुएं गी लेइयै जा'रदी इक गड्डी हादसे दा शिकार होई गई। 11 घायलें गी माहिर इलाज आस्तै जीएमसी अस्पताल कठुआ भेजेआ गेआ ऐ। हादसे दी खबर थ्होंदे गै पुलस, जिला प्रशासन दी टीम ते मुकामी लोकें आपसी तालमेल कन्नै राहत ते बचाव अभियान चलाया ते घायलें गी फौरी मेडिकल सहायता उपलब्ध करोआई। हादसे दे कारणें दा अजें पता नेई लगा ऐ। केंद्री राज्यमंत्री डा. जितेंद्र सिंह होरें

आखेआ जे उनें कठुआ डिप्टी कमिशनर हुंदे सुकराला माता श्रद्धालुएं आहले हादसे बारै गल्ल कीती ऐ। उनें आखेआ जे हर संभव सहायता उपलब्ध करोआई जा'रदी ऐ।

<><><><><><>

Dy. CM-Surinsar

उपमुख्यमंत्री सुरिंद्र चौधरी होरें अज्ज सरूईसर दे मकामी बसनीके कन्नै गल्लबात कीती ते सरूईसर झील ते इलाके दे होर दुए ढांचागत प्रोजेक्टें ते विकास बाहे सरबंधी इनें लोकें दिएं चिंताएं ते आसें-ताहंगें बारै पुच्छेआ पछ्याया। मकामी लोकें उनेंगी इलाके दिएं बुनियादी जरूरतें दे बारै च दस्सेआ जिसलै कि उपमुख्यमंत्री होरें उत्थै जारी विकास कम्में दी प्रगति ते रफ्तार दा बी जायजा लैता। सुरिंद्र चौधरी होरें सरबन्धित अधिकरिणं ते कम्में गी तोढ चाढारदिणं एजेसिणं गी आखेआ कि कम्में दी रफ्तार च तेजी आहन्न ते म्यार कन्नै विजन कोई समझौता कीते दे इनेंगी मित्थे गेदे समें दे अंदर-अंदर तोढ चाढना यकीनी बनान। लोक केंद्र शासन पर जोर दिंदे होई उनें आखेआ कि हर विकास पैहल इस चाल्ली दी होनी लोडचदी जेहदे नै मकामी लोकें दियां जरूरतां पूरियां होन, ढांचागत सुविधां निगगर बनन, सैलसफा गी बढावा थहोए ते इलाके दा पूरा पराता विकास जकीनी बनै।

<><><><><><>

Census-Udh.

जम्मू-कश्मीर दे सभनें जिलें च मर्दमशुमारी दी प्रक्रिया अपने खीरी गेड च ऐ ते फील्ड अमला घर-घर जाइयै लोकें कोला जानकारी किट्टी करै करदा ऐ। अधिकारिणं दा आखना ऐ कि मकानें दी गिनतरी ते जानकारी कठेरने दे कम्मै दा एहू खीरी हफ्ता ऐ ते लोकें अगगे अपील कीती जंदी ऐ कि ओहू उंदे घर औने आहले फील्ड कर्मिणं गी स्हेई-स्हेई जानकारी देइयै सहयोग करन। उधमपुर जिले च मुंसिपल काउंसल दे सी.ई.ओ होरें दस्सेआ ऐ कि किश घरें च फील्ड अमले दे दौरे दरान जंदरे लग्गे दे लब्बे जिसलै कि केई परिवार आरजी तौरा पर जिले थमां बाहर गेदे पाए गो। उनें ऐसे लोकें गी चेचे तौरा पर आखेआ कि ओहू अगले 7एं दिनें दे अंदर-अंदर मर्दमशुमारी सरबन्धी अपरियां औपचारिकता पूरी करी लैन।

<><><><><><>

Poonch-Polio

मैहकमा सेहत पुंछ नै 28 जून गी शुरू होआ'रदे पल्स पोलियो टीकाकरण कार्यक्रम दे अगले गेड़ लेई लोड़चदे सब्बै बंदोबस्त करी लैते दे न। इस बारै मीडिया कर्मियें कन्नै जानकारी सांझी करदे होई डिप्टी सी.एम.ओ डा. रूबी भट्टी होरें दस्सेआ कि पूरे जिले च इस कम्मै लेई 427 टीकाकरण बूथ बनाए गेदे न ते 854 टीमां बी तैयार कीतियां गेदियां न जेहड़ियां इस प्रक्रिया गी मुकदा रूप देडन। इनें टीमें च 1 ज्हार 700 कोला मते सेहत कर्मी शामिल कीते गेदे न। इस अभियान तैहत जिले च 79 ज्हार 560 बच्चें गी पोलियो कोला बचाऽ आहली दोआई दी खराक पलेआई जाहग। उनें दस्सेआ जे विशेष ध्यान चेचे तौरा पर 24 दूर-दरेडे ते कठन इलाकें ते 6 मती उंचाई आहले इलाके बक्खी दित्ता जा'रदा ऐ तां जे 5एं बरें धोड़ी दी उम्री दा कोई बी बच्चा पोलियो दियां बूदां पोआए दे रेही नेई जा। बच्चें दे माता-पिता गी बी आखेआ गेआ ऐ जे ओहू जित्थै कुदरै बी होन इस गल्लै गी जकीनी बनान जे उंदे न्याणें गी एहू बूदां जरूर पलेआइयां जान।

<><><><><><>

Weather

मौसम विभाग नै 3 जुलाई धोड़ी दे मौसम दी पेशनगोई करदे होई आखेआ ऐ कि इस दौरान मौसम रला-मिला रौहने दे आसार न। अधिकारिक जानकारी मुजब 29 जून गी दपैहर तगर मौसम आमतौरा पर खुशक रौहग-जेहदे परैन्त किश टांवी-टांवी थाहरें अंधी-झक्खड़ ते गर्जी लिशिकयै हलकी कनी-कनोन बी होई सकदी ऐ। ओहदे बाद उआं- मौसम च बदलाव औने दी मेद कीती जा'रदी ऐ ते 30 जून कोला लेइयै 3 जुलाई तगर हलकी कोला दरमयानें दर्जे दी बरखा बरी सकदी ऐ। इस दौरान मती सारी थाहरें धूड़ आहला अंझी-झक्खड़ झुल्लने दे बी असार न।

<><><><><><>